

Izjava visokog predstavnika na konferenciji za medije povodom završetka pregovora na Vlašiću

Put Bosne i Hercegovine u Evropu će biti dug i težak – ali tokom protekla četiri dana na Vlašiću napravili smo veliki i značajan korak na tom putu.

Ali što je još važnije, ono što smo mogli vidjeti na Vlašiću u proteklih nekoliko dana također predstavlja kratak pogled u budućnost.

Ako želite znati kakva će Bosna i Hercegovina biti kao potpuno suverena država, trebali ste samo biti u sali za sastanke u hotelu Pahuljica.

Pregovore su u potpunosti vodili lideri vaših političkih stranaka, oni na vlasti i oni u opoziciji, uz rukovođenje mog uvaženog kolege, kopredsjedavajućeg gospodina Adnana Terzića.

Uloga međunarodne zajednice bila je samo uloga posrednika.

Uspjeh koji je postignut predstavlja prvu fazu nečega što, vjerujem, ima potencijal da postane historijski sporazum, i to ne samo zbog onoga što je dogovoreno već i zbog načina na koji je taj dogovor postignut. Ovo je dogovor na koji možete staviti samo jednu oznaku, “Proizvedeno u BiH”, a ne od strane međunarodne zajednice.

Pregovori bi zasigurno propali već u ovoj prvoj fazi da nije bilo političkog vodstva i hrabrosti koje su pokazali lideri vladajućih i opozicionih političkih stranaka na Vlašiću, koji su čak bili spremni da rizikuju i vlastitu budućnost kako bi ovoj zemlji dali budućnost.

Gotovo bez izuzetka, ono što smo vidjeli tokom ovih pregovora bio je kompromis i istaknute državničke sposobnosti. Vidjeli smo pravo vodstvo, a ne samo stranačko vodstvo.

Kao i uvijek, neki koji su bili po strani će prigovarati.

Čut ćete taj poznati vapaj iz prošlosti: vapaj izdaje. Čućete ga od Srba, Bošnjaka i Hrvata. Čućete ga iz Banja Luke, iz Sarajeva i Mostara.

I ovo je dio politike, ali to je "sitna" politika. To je politika koja uvijek stavlja "mene" ispred "nas". To je politika prošlosti.

Na Vlašiću smo imali priliku vidjeti pravu, dalekosežnu politiku. To je jedina politika koja ovoj zemlji može osigurati budućnost. Jedina politika koja stavlja zemlju na prvo mjesto.

Ali moram naglasiti da ovo ipak nije pobjednički govor. Sada je potrebno finalizirati drugu fazu ovog procesa koji se odvija u dva koraka – kao što ste već čuli, pregovori su vođeni na principu da ništa nije dogovoreno dok sve ne bude dogovoreno.

Dakle, čeka nas još posla koji moramo uraditi da bi okončali ovaj proces. Druga faza, u kojoj će se razmatrati mape, također će biti teška. Ali ako atmosfera koju smo imali na Vlašiću prevlada i daljim tokom ovog procesa, nimalo ne sumnjam da može uspjeti, i da hoće uspjeti.

Konačni Politički sporazum moraju ratificirati parlamenti oba entiteta prije nego što Konsultativna radna grupa Evropske unije donese svoju konačnu odluku sredinom juna.

Ali obzirom da smo došli tako daleko, najveća tragedija bila bi da sada posrnemo pred posljednjom preprekom. Ne vjerujem da će se to dogoditi. Uspjeh znači da bi BiH već u junu ove godine mogla započeti pregovore za Sporazum o stabilizaciji i

pridruživanju.

Već dugo vremena sam u politici, tako da me nije baš lako impresionirati. Ali doista sam bio impresioniran onim što sam vidio na Vlašiću, i svaki drugi međunarodni posmatrač u BiH iz Brisela, Vašingtona, ili bilo koje druge prijestolnice također bi trebao biti impresioniran.